

Vwnzva Mehbuz Bouxcuengh

壮族花婆文化

□ Maknam hoiz

Mehbuz Bouxcuengh dwg boux-saenz laeng ndawgoj gwnzbiengz Guengjsae. Haujlai dieg nyinhnaeuz de dwg bouxsaenz guenj seng lwg, guenj lwg haenx. Mbangj dieg caiq miz gij goj mbouj doengz de. Gij goj Mehbuz couh yienghneix buenx gyoengqvunz majhung, daih cienz daih.

Cienzgangj, Mehloeggyap boux cojgoeng Bouxcuengh neix dwg daj ndawva doekseng, de cawjdaez guenj gij saeh soengq va soengq lwg. Vunzbiengz cungj dwg daj gij va ndaw suen Mehloeggyap doekseng, ndigah vunzlai couh guenj de guh bouxsaenz Mehbuz. Liggaeuq ndwen ngeih ngoenz ngeihgouj dwg ngoenz-seng Mehloeggyap, gyoengq mehmbwk Bouxcuengh youq ngoenzde couh couqngaenz cawx bit, gaeq, yieng, lab, ceijngaenz daengj buizcaeq Mehbuz, doxcaez bae ndoi mbaet va ma daep, mbaenjgouz miz lwg roxaeuz muengh lwg maj ndei baenz vunz. Mehbuz soengq vahau couh seng lwgdaeg, soengq vahoengz couh seng lwgdah. Danghnaeuz baezlaeng mizndang, lij aeu cingj bouxsae youq gyangdoengh niemhging gouz va, youq diuzmieng henzroen guh yizsiz gaqgiuz, daj gwnz

giuz cieп dujva gvaqma. Seng lwg le, lij aeu youq gyaеujmbonq an aenbaed Mehbuz, daj gwnz ndoi mbaet va ma buiz. Mbangj dieg lij youq henzmbanj roxaeuz laj dinbya guh mih Vavuengz.

Nanzningz Si Yunghningz Gih Bujmyau Cin lij riuz miz aen goj mbouj doengz ndeu. Cienzgangj, youq haujlai nanz gaxgonq, henz Dah-yunghgyangh, laj Byayinzcinj miz geij go faexrungz hung. Lajfaex raemh-fwdfwd, liengz raixcaix, vunzlai byaij gvaq cungj maij youq gizneix yietbaeg. Mbouj rox daj seizlawz doxdaeuj, couh miz boux mehbuz bwn'gyaeu haunyo ndeu youq lajfaex gai haeuxcuk. Mehbuz neix sim ndei raeuh, mbouj-guenj mwngz miz mbouj miz ngaenz, caenh miz vunz byaij gvaq henz, mehbuz couh daek vanj haeuxcuk ndat ndeu riuyumyum heuh mwngz gwn. Gangj daeuj caemh geizheih, vunzlai gwn le haeuxcuk mehbuz, mboujdan ndaej gaij hozhawq, danghnaeuz fat bingh ne, doq gwn bingh doq ndei caez. Haujlai vunz gwn le haeuxcuk mehbuz couh miz caijsoq ndei, baezlaeng cungj guhhoengh hwngfat, gvaq ndaej an' onj. Bouxlawz cungj mbouj rox mehbuz daj gizlawz daeuj,



▲ Mehbuz Bujmyau.

mbangj naeuz de dwg duzyou faex deng raemxlaux daj baihyae cung daeuj; mbangj gangj de dwg naengh aen lwggyoux sien bouxsien vut youq Dahyunghgyangh haenx fouz daeuj; mbangj cix cienz de dwg dahsaenzva gwnzmbwn bienqdaeuj. Saeh Mehbuz cienz okbae le, vunzlai cungj haengi

senj daeuj gizneix youq, doeklaeng vunz yied daeuj yied lai, couh baenz aen haw. Vih geiqniemh Mehbuz, vunzlai couh youq henz Dahyunghgyangh hwnq le mih Mehbuz, heuh aen haw neix guh "Mihbuz", couh dwg Bujmyau Cin seizneix.

Moix bi liggaeuq ndwen sam ngoenz cibngeih, Bujmyau Cin couh guh hozdung hai haw guh cin. Gek sam bi youh guh mbat daihhoh geiqniemh Mehbuz ndeu. Bi 2011, dieg de guh gaiq daih'it ciet Mehbuz. Ngoenzde miz ciengj bauqva, doiq fwen, batyaem biujyienj, foux lungz foux saeceij, heiq Guengidoeng, "Mehbuz fat haeuxcuk", cuengq daengdah daengj. Ndawde "Mehbuz soengq haeuxcuk" caeuq Mehbuz cunzyouz ceiқ mizyinx. "Cuk Mehbuz, goenjibibi, menhmenh gwn, cungj miz fuk." Saek cib boux vunz daep mauhngge Mehbuz, daenj buhvaq minzcuz hawj vunz seiqhenz soengq haeuxcuk, vunzlai baiz ndaej raezraez, cungj muengh Mehbuz ndaej hawj fuk hoh vunz souhyienz.

Mehbuz cunzyouz caemh gig nauhyied. Aen ci "Mehbuz Soengq Fuk" byaij baihnaj, "Mehbuz" fwngz gaem song nyup va naengh gwnz ci, dahsau ndeu caeuq daegsai ndeu ndwn song henz. Lwgsai dawz daeng'va'ngaеux, dahsau fwngz ndeu dawz vanj haeuxcuk, fwngz ndeu dawz buiz. Aen doih cunzyouz riengz byaij baihlaeng. Yienhciengz vunz lai vunz daih, angqangq riuriu.

Bujmyau Cin guh ciet Mehbuz, mboujdan ndaej langhbaij vwnzva minzcuz dieg de, lij ndaej coicaenh gak dieg de lijyouz hwngfat, gak minzcuz huzndei hwngfat.



◀ Mehbuz cunzyouz.



▲ Mehbuz fat haeuxcuk.



▲ Mehmbwk cangguh Mehbuz.

◀ Ngoenz ciet vunz lai vunz daih.